

SAI MEMBRU ASEAN, TIMOR-LESTE PRONTU ONA KA LAE?

HUSI: LA'O HAMUTUK

Artigu ne'e publika iha TimorPost, 17 Setembru 2010

Oras ne'e mosu diskusaun no informasaun oi-oin iha rai laran kona-ba Timor-Leste atu sai membru ASEAN. Diskusaun no informasaun sira ne'e dalabarak koalia kona-ba benefisiu no mós desvantajen oi-oin ne'ebé Timor-Leste sei hetan wainhira sai membru ASEAN. Artigu ne'e, hakarak refleta uitoan situasaun jeral ekonomia Timor-Leste nian hodi liga uitoan ba planu Timor-Leste nian atu sai membru ASEAN.

Timor-Leste nia populasaun 80% resin moris husi seitor agrikultura. Maski nunee, seitor ida ne'e too oras ne'e seidauk sai seitor prinsipal ne'ebé dudu dezenvolvimentu Timor-Leste nian. Iha realidade, Timor-Leste nia ekonomia sei depende hela ba rendimentu husi rikusoin mina no gas ho orsamentu estadu besik 100% mai husi seitor ne'e. Kondisaun ne'e mosu tanba politika governu nian no mós kapasidade agrikultor sira nian. Oras ne'e agrikultor barak labele dezenvolve sira nia ekonomia maski sira iha rikusoin agrikultura nian ne'ebé boot. Sira mós laiha kbiit makaas atu kompete ho produsaun agrikultura husi rai liur. Bele haree iha realidade katak Timor-Leste agora nakonu ho sasan agrikultura oi-oin ne'ebé importa husi rai liur, hanesan foos, liis, sabaraka, fehuk ropa no sel-seluk tan ne'ebé tuir lolos bele produz iha rai laran. Hasoru problema sira hanesan ne'e governu seidauk halo politika ida atu proteze produitu agrikultor Timor-oan nian, no ita nia agrikultor sira rasik simu deit situasaun ne'e tanba ladun iha koñesimentu no informasaun natoan kona-ba oinsa sira nia produitu bele hetan folin diak.

Iha parte seluk, Timor-oan barak mós hala'o sira nia moris hanesan negosiante no komersiante, kiik ka boot. Negosiante ka komersiante sira ne'e barak mak la iha formasaun diak kona-ba komersiu nian. Iha Timor laran tomak oras ne'e komersiante husi rai liur barak mak domina fatin estratéjiku no produitu estratéjiku sira. Bele haree ho loja Xina nian ne'ebé halekar husi Dili tama too distritu sira, bele haree oinsa ema husi liur mak tunu sate, halo terang-bulan no faan dosi iha Dili nia dalan ninin sira.

Ba nivel ne'ebé aas liu emprezariu Timor-oan sira barak nia servisu kontinua hetan krítika makaas tanba kualidade ne'ebé la diak, nune'e sei susar atu kompete ho emprezariu sira husi rai liur. Foin lalais ita haree iha diariu ida, PM rasik dehan katak projetu konstrusaun estrada nasional sira sei fo ba kompañia internasional sira mak kaer tanba sira mak bele halo estrada ne'ebé iha kualidade diak liu no tahan kleur.

Situasaun agrikultor, komersiante/negosiante, no mós emprezariu Timor-oan sira iha leten, refleta mós oinsa atensaun ne'ebé fo ona husi governu ba sira. Dadus husi Ministeriu Agrikultura hatudu kresimentu diak iha produsaun ai-han iha rai laran husi tinan ba tinan, maibé importasaun ba foos husi rai liur mós kontinua sae nafatin. Seitor agrikultura ne'ebé iha servisu atu garantia Timor-Leste bele fo han nia-an rasik, nia orsamentu husi tinan kotuk too tinan ne'e maizumenus 4% deit husi total orsamentu estadu. Komersiante/negosiante Timor-oan sira hetan problema boot mós wainhira governu halo desizaun ba sira nia moris sein rona sira nia hanoin no mós laiha planu kapasitasaun ida ne'ebé klaru ba sira. Emprezariu sira fali, sira ne'ebé iha kapasidade no kualidade diak la hetan valor husi estadu wainhira governu fahe projeitu la bazeia ba

kualidade emperezariu sira nian, no emperezariu sira ne'ebé laiha kualidade lakon obrigasaun atu hadiak sira nia kualidade servisu nian tanba sistema fahe projetu ne'ebé la tuir sistema ne'ebé akuntavel.

Haree ba situausaun jeral sira hanesan iha leten, mosu pergunta saida lós mak planu Timor-Leste nian kona-ba ninia dezentvolvimentu ekonomia rai laran. Mosu mós pergunta se ekonomia Timor-Leste nian iha ona kbiit atu kompete ho ekonomia rai liur nian ka lae. Tanba, atu hadiak ekonomia Timor-Leste nian, atu povu ne'e iha kapasidade atu kompete ho rai liur, buat importante ne'ebé tenki iha mak politika no planu ida ne'ebé diak no klaru atu dezentvolve ekonomia rai laran nian rasik, hanesan oinsa sistema atu fo kapasitasaun ba agrikultor sira, ba komersiante kiik sira, ba emperezariu lokal sira, no mós oinsa politika atu promove no proteze produktu rai laran ninia kualidade, kuantidade no mós nia folin iha merkadu rai laran. Atu realiza asaun sira hanesan iha leten, Timor-Leste la presija hein too mosu kompetisaun, maibé tenki hala'o duni politika sira ne'e atu garantia ninia independensia ekonomia nian. Wainhira Timor-Leste rasik seidak klaru kona-ba ninia ekonomia rasik, ninia povu seidak iha kbiit atu kompete iha seitor oi-oin, sai membru ASEAN sei lori problema lubuk ida mai ita. Tanba wainhira Timor-Leste sai ona membru ASEAN, ASEAN nia akordu Merkadu Livre sira sei obriga Timor-Leste loke nia-an ba merkadu rai liur nian no sei obriga Timor-Leste atu muda ninia lei no politika balu ne'ebé bele limita governu Timor-Leste nia apoiu ba ninia povu rasik.

Sai membru ASEAN labele sai hanesan objektivu ikus nian. Esperansa atu sai membru ASEAN tenki fo motivasaun ba Timor-Leste atu haree fali ba nia uma laran rasik no prepara-an didiak nune'e Timor-Leste bele sai nasaun ida ne'ebé independente ekonomikamente tanba nia agrikultor sira bele halo produsaun ne'ebé iha kualidade, nia komersiante/negosiante sira iha kapasidade atu kompete ho komersiante husi rai liur no nia emperezariu sira mós bele kompete justamente ho emperezariu husi rai ne'ebé deit.